

հրդարանն նախարարին: Թէ ի՞նչ է այդ ծածուկ խորհրդարանի պաշտօնը — ոչինչ չգիտենք, որովհետեւ այդ մասին այլեւս ոչ մի յիշատակութիւն չկայ «Որոգ. Փառաց»ի մէջ: Ինչպէս երեւում է, հեղինակն էլ չփոթութեան մէջ է, որովհետեւ 12-ի խորհուրդն էլ նա սովորաբար կոչում է «ծածուկ խորհրդարան»: Թերեւս այդ հիմնարկութիւնը միայն զինուորական որոշ գործերի համար է: Յամենայն դէպս, թէեւ մի քանի անգամ յիշում է «ծածուկ խորհրդարանի» անունը, բայց թէ ո՞ր ծածուկ խորհրդարանը պիտի հասկանալ՝ 12-ինը թէ 6-ինը — դժուար է ասել:

4. Ընտրւում են 9 հոգի սպարապետութեան համար, որոնցից իւրաքանչիւր 3 հոգին կազմում է մի կոլլեգիալ սպարապետութիւն: Այսպիսով Հայաստանն ունի 3 բանակ եւ 3 սպարապետութիւն — առաջին, երկրորդ եւ երրորդ կամ կարմիր, կապոյտ եւ դեղին, համաձայն բանակների դրօշակի գոյների: Առաջին սպարապետը իւրաքանչիւր սպարապետութեան մէջ աւելի նախապատիւ է, քան երկրորդն ու երրորդը եւ երկրորդը աւելի նախապատիւ է, քան երրորդը: Դա երեւում է նրանից, որ ժառանգական հանր. նախագահի որդիները հայոց բանակում կարող են բռնել երկրորդ սպարապետի պաշտօնը, բայց ոչ երբեք առաջինը (իդ, կք, ծգ):

5. Ընտրւում են 9 հոգի ասպետութեան, այսինքն՝ հեծելազօրքի համար ճիշդ նոյն հիմունքներով, ինչպէս սպարապետները: Նախապատուութեան նոյն կարգը նաեւ այստեղ. (իե, կգ):

6. Եւս 9 հոգի «վասն հրաց զօրագլխութեան», այսինքն՝ հոգալու բանակների զէնքի եւ ռազմամթերքի համար: Հիմունքները նոյնն են, ինչ որ վերելում տեսանք (իգ, կդ):

7. Ընտրւում են 27 հոգի, որոնք բաժանւում են 9 կոլլեգիայի, իւրաքանչիւր կոլլեգիային 3 հոգուց բաղկացած: Այդ կոլլեգիաներն են. —

ա. Լրտեսպետութիւն, բ. զինապետութիւն, գ. վառօդապետութիւն, դ. կառապե-

տութիւն, ե. վրանապետութիւն, զ. կերակրապետութիւն, է. գանձապետութիւն, Ը. երկրաչափութիւն, եւ Թ. պետ տկարաց եւ աղքատաց:

Կոլլեգիաների անդամները իրենց պաշտօնների անուան հետ միասին կոչւում են առաջին, երկրորդ, երրորդ, օրինակ՝ առաջին լրտեսպետ, երկրորդ լրտեսպետ, երրորդ լրտեսպետ եւն. (իէ, կե, կզ, կէ, կթ, հ. հա, հբ, հգ):

Կոլլեգիաների մասին քիչ յետոյ:

8. Ընտրւում են 60 հոգի երկրի 60 շրջանները կամ նահանգները կառավարելու համար կամ ինչպէս հեղինակն է ասում՝ «վասն ծայրագոյն իշխանութեան մէջ քաղաքաց կառավարելոյ»: Սրանք երկրի նահանգապետներն են կամ կուսակալները (իը, ըժա):

9. Ընտրւում են եւս 60 հոգի, որոնցից իւրաքանչիւրը, որպէս նախագահ, տեղերում լրացնում է կազմը, ընտրելով 8 հոգի եւ շրջանային կամ նահանգական դատարանը կազմում (իթ, կա):

10. Ընտրւում են 90 հոգի Հայաստանի 90,000 գօրքի հաղարապետութեան համար (լ. իդ):

11. Ընտրւում են 3 հոգի «վասն դիւրութեան եւ թեթեւութեան եւ հեշտութեան ջատա գովելոյ առաջի ատենի տանուտէրաց մէջ տանն հայոց վասն հարկաց, մաքսից, բաժնից, հասից, տոկոսաց եւայլն վասն բարութեան հասարակ ժողովրդոց» (լա):

12. Ընտրւում են եւս 3 հոգի «վասն զգուշանալոյ ի վերայ ոռճիկի հատուցման պաշտօնէից»: Ուրիշ խօսքով՝ նրանք մի տեսակ պետական վերահսկիչներ են, որոնց գլխաւոր պարտականութիւնն է սակայն հսկել ոռճիկների կանոնաւորութեան վրայ (լբ, հգ):

Ահա այն բոլոր բարձր պաշտօնները, որոնք ընտրուելով պատգամաւորների միջից, պաշտօնի բերումով հարկադրուած են լինել այստեղ-այնտեղ, զուտ պարլամենտական աշխատանքները թողնելով մնացածներին կամ «տանուտէր» պատգամաւորներին: